

Populaziun n'è betg propi persvasa da l'idea per ina punt

■ (rtr) La suprastanza communal da Mustér ha laschè far in studi per ina colliaziun dal vitg cun Salaplauna. Il resultat dal studi è ina punt da radund 170 meters davent dal sutpassadi da la staziun enfin avant la stalla da la claustra. La punt ha in'atezza da var 21 meters ed ils custs da construcziun èn calculads cun 1,9 milliuns francs.

Tge far a Salaplauna?


Il studi ha procurà per inqual discussiun tar la populaziun da Mustér. Tranter auter vegn sa dumandà tge ch'ins vul far a Salaplauna. Tenor il president communal *Francesco Cajacob* na duai la punt betg mo esser ina colliaziun cun il Center sursilvan d'agricultura che porscha differentas occurrenz, ubain tar la Sennaria. La punt duai er esser ina colliaziun per Fontanivas. Uschia pudess il trutg che maina a Fontanivas vegnir schlargià sin ina senda nua ch'ins po er ir atras cun

charrotschas da pops. In'atra idea fissa era da far ina senda da viandar enturn Salaplauna. Per passagiers dal tren che arrivivan a Mustér dettia la punt era la pussaivladad da pudair contemplar il vitg e quai cun ir mo in curt toc a pe. La punt duai tenor Cajacob dentant er esser ina nova attracziun per il vitg.

Vischnanca finanziescha mo pitschna part

Sco che ha ditg Cajacob vinavant na duai la cassa communal betg vegnir engrevgiada fitg cun ils custs da quest project. La suprastanza tschertgia sponsurs ed autras pussaivladads da finanzia la punt. Ils custs per la vischnanca duain restar in bun toc sut in mez milliun, ha ditg Cajacob.

Betg sco ultim duai la realisaziun dal project visibel dar impuls ed animar la populaziun da sezza daventar activa e realisar ideas en vischnanca.



Visualisaziun: La Punt da 167 meters lunghezza e 2,5 meters ladezza duess esser ina attracziun turistica.